

Ձեռնագրի սէրը, ինչպէս կը վկայէ Երեմիա 1684ին անոր ձօնած Ուղերձին մէջ (Յաւել. էջ, 537) .

«Ոչ գոլ պատճառ իմն թէ սիրտ իմ միշտ քեզ բազձայր, Որդւոյս առթիւ որ ցուցեր սէր՝ զայս զրի պատճառ» :

Եղիազար կաթողիկոս 1681 Յունիս 7ին Երուսաղէմէն կը հասնի Զմիւռնիա ու հոն կը սպասէ մինչև Սեպտ. 22: Գրիգորիս արեղայ անոր կը ներկայանայ Յուլիս 1ին, ինչպէս կը գրէ Ամգեցի իր Օրագրութեան մէջ. «Յուլիսի մէկ . . . Քօմուրնու բոուն եկաւ մօտ Վեհին» (թղ. 4ա): Եղիազար Սեպտ. 22ին կը մեկնի Զմիւռնիայէն և ցամաքային ճամբով Հոկտ. 8ին կը հասնի Պրուսա. ու հոն կը մնայ 4 ամիս ու 23 օր: 1682 Մարտ 1ին դուրս կ'ելլէ Պրուսայէն ու 4ին կը մտնէ Կ. Պոլիս ու կ'իջևանի Սամաթիոյ Ս. Գէորգ եկեղեցին: Այդ օրերուն Գրիգորիս արեղայ ևս դարձած էր իր ծննդավայրը: Ապրիլ 23ին ան կը պատարագէ Ս. Գէորգ եկեղեցին ու կաթողիկոսը կը քարոզէ, ըստ Ամգեցիի Օրագրութեան. «Ապրիլ ԻԳ. Խտրէլէզ և նոր կիւրակէ, ժամարար Քօմուրնի արեղան. անգաստան չարաց, քարոզ՝ Վեհն» (թղ. 12բ):

Եղիազար կաթողիկոս 1682 Յունիս 15 կ'ուղևորի Կ. Պոլսոյ նեղուցէն դէպի Էջմիածին՝ իրեն հետևորդ ունենալով Մինաս Ամգեցի, նահապետ Եղեսայի (ապա կաթողիկոս), Սուքիաս և Նիկողայոս վարդապետները: Ամգեցի թէև որևէ յիշատակութիւն չ'ընէ իր Օրագրութեան մէջ, բայց հաւանական է որ կաթողիկոսը, Երեմիայի փափաքին համաձայն, հետը տարած ըլլայ նաև Գրիգորիս արեղան, որպէսզի ան Էջմիածնի մէջ ձեռք բերէ «զկատարելութիւն ուսման», ինչպէս երկու տարի առաջ խորհուրդ տուած էր Յակոբ կաթողիկոս: Եղիազարի Կ. Պոլսէն հեռանալէն վերջ Երեմիա իր որդիին կ'ուղղէ չորս նամակներ (Յաւել. էջ 446 - 470): Այդ նամակներէն երրորդը միայն ունի